

四庫全書

史部

欽定四庫全書

史部
魏書卷一百
七下至
八之二

詳校官編修臣溫汝造

洗馬臣王坦修覆勘

覆校官中書臣孫希旦

校對官中書臣朱圻

謄錄貢生臣陳昌敬

欽定四庫全書

魏書卷一百七下

齊

魏

收

撰

志第九

律歷三下

孝靜世壬子歷氣朔稍違熒惑失次四星出伏歷亦乖
舛興和元年十月齊獻武王入鄴復命李業興令其改
正立甲子元歷事訖尚書左僕射司馬子如右僕射隆

之等表曰自天地剖判日月運行剛柔相摩寒暑交謝
分之以氣序紀之以星辰弦望有盈缺明晦有修短古
先哲王則之成化迎日推策各有司存以天下之至王
盡生民之能事先天而天弗違後天而奉天時及卯金
受命年厯屢改當塗啓運日官變業分路揚鑣異門馳
騫回互靡定交錯不等豈是人情淺深苟相違異蓋亦
天道盈縮欲止不能正光之厯既行於世發元壬子置
差令朔測影清臺懸炭之期或爽候氣重室布灰之應

少差伏惟陛下當璧膺符大橫協兆乘機虎變撫運龍
飛苞括九隅牢籠萬寓四海來王百靈受職大丞相渤
海王降神挺生固天縱德負圖作宰知機成務撥亂反
正決江疏河效顯勤王勲彰濟世功成治定禮樂惟新
以履端歸餘術數未盡乃命兼散騎常侍執讀臣李業
興大丞相府東閣祭酒夷安縣開國公臣王春大丞相
府戶曹參軍臣和貴興等委其刊正但回舍有疾徐推
步有疎密不可以一方知難得以一途揆大丞相主簿

臣孫塞驃騎將軍左光祿大夫臣曄前給事黃門侍郎
臣季景渤海王世子開府諮議參軍事定州大中正臣
崔暹業興息國子學生屯留縣開國子臣子述等並令
參預定其是非臣等職司其憂猶恐未盡竊以蒙戎為
飾必藉衆腋之華輪奐成宇寧止一枝之用必集名勝
更共修理左光祿大夫臣盧道約大司農卿彭城侯臣
李諧左光祿大夫東雍州大中正臣裴獻伯散騎常侍
西兗州大中正臣溫子昇太尉府長史臣陸操尚書右

丞城陽縣開國子臣盧元明中書侍郎臣李同軌前中
書侍郎臣邢子明中書侍郎臣宇文忠之前司空府長
史建康伯臣元仲俊大丞相法曹參軍臣杜弼尚書左
中兵郎中定陽伯臣李溥濟尚書起部郎中臣辛術尚
書祠部郎中臣元長和前青州驃騎府司馬安定子臣
胡世榮太史令盧鄉縣開國男臣趙洪慶太史令臣胡
法通應詔左右臣張詰員外司馬督臣曹魏祖太史丞
郭慶太史博士臣胡仲和等或器擿民譽或術兼世業

並能顯微闡幽表同錄異詳考古今共成此歷甲為日
始子實天正命厯置元宜從此起運屬興和以年號為
目豈獨太初表於漢代景初冠於魏厯而已謹以封呈
乞付有司依術施用詔以新厯示齊獻武王田曹參軍
信都芳芳闕通厯術駁業興曰今年十二月二十日新
厯在營室十二度順疾天上歲星在營室十一度今月
二十日新厯鎮星在角十一度留天上鎮星在亢四度
留今月二十日新厯太白在斗二十五度晨見逆行天

上太白在斗二十一度逆行便為差殊業興對曰歲星
行天伺候以來八九餘年恒不及二度今新厯加二度
至於夕伏晨見纖毫無爽今日仰看如覺二度及其出
沒還應如術鎮星自造壬子元以來歲常不及故加壬
子七度亦知猶不及五度適欲并加恐出沒頓校十度
十日將來永用不合處多太白之行頓疾頓遲取其會
歸而已近十二月二十日晨見東方新舊二厯推之分
寸不異行星三日頓校四度如此之事無年不有至其

伏見還依術法又芳唯嫌十二月二十日星有前却業興推步已來三十餘載上算千載之日月星辰有見經史者與涼州趙旼劉義隆廷尉卿何承天劉駿南徐州從事史祖冲之參校業興甲子元厯長於三厯一倍考洛京已來四十餘歲五星出沒歲星鎮星太白業興厯首尾恒中及有差處不過一日二日一度兩度三厯之失動校十日十度熒惑一星伏見體自無常或不應度祖冲之厯多甲子厯十日六度何承天厯不及三十日

二十九度今厯還與壬子同不有加增辰星一星沒多
見少及其見時與厯無舛今此亦依壬子元不改太白
辰星唯起夕合為異業興以天道高遠測步難積五行
伏留推考不易入目仰闕未能盡密但取其見伏大歸
略其中間小謬如此厯便可行若專據所見之驗不取
出沒之效則厯數之道其幾廢矣夫造厯者節之與朔
貫穿於千年之間閏餘斗分推之於毫釐之內必使盈
縮得衷間限數合周日小分不殊錙銖陽厯陰厯纖芥

無爽損益之數驗之交會日所居度考之月蝕上推下減先定衆條然後厯元可求猶甲子難值又雖值甲子復有差分如此躋駁參錯不等今厯發元甲子七率同遵合璧連珠其言不失法理分明情謂為可如芳所言信亦不謬但一合之裏星度不驗者至若合終必還依術鎮星前年十二月二十日見差五度今日差三度太白前差四度今全無差以此準之見伏之驗尋效可知將來永用大體無失芳又云以去年十二月中算新厯

其鎮星以十二月二十日在角十一度留天上在亢四度留是新厯差天五度太白歲星並各有差校於壬子舊厯鎮星差天五度太白歲星亦各有差是舊厯差天為多新厯差天為少凡造厯者皆須積年累日依法候天知其疎密然後審其近者用作厯術不可一月兩月之間能正是非若如熒惑行天七百七十九日一遲一疾一留一逆一順一伏一見之法七頭一終太白行天五百八十三日晨夕之法七頭一終歲星行天三百九

十八日七頭一終鎮星行天三百七十八日七頭一終
辰星行天一百一十五日晨夕之法七頭一終造厯者
必須測知七頭然後作術得七頭者造厯為近不得頭
者其厯甚疎皆非一二日能知是非自五帝三代以來
及秦漢魏晉造厯者皆積年久測術乃可觀其倉卒造
者當時或近不可久行若三四年作者初雖近天多載
恐失今甲子新厯業興潛構積年雖有少差校於壬子
元厯近天者多若久而驗天十年二十年間比壬子元

歷三星行天其差為密獻武王上言之詔付外施行

上元甲子以來至春秋魯隱公元年歲在己未積二十九萬二千七百三十六算上

甲子之歲入甲戌紀己來積十二萬四千一百三十六算上

上元甲子以來至大魏興和二年歲在庚申積二十九萬三千九百九十七算上

甲子之歲入甲戌紀至今庚申積十二萬五千三百九

十七算上

元法一百一萬一千六百

三統之數

統法三十三萬七千二百

二紀之數

紀法十六萬八千六百

千部成紀日數至十

部法一萬六千八百六十

三十乘章歲得日月餘皆盡之年數

度法一萬六千八百六十

三十乘章歲得此數

日法二十萬八千五百三十

三十乘章月得此數

氣時法一千四百

小二分度法得一時之數

章歲五百六十二

二十九章十一年減閏餘二萬一百七十八年減右一閏月

章閏二百七

五百六十二年之閏月數

章月六千九百五十一

五百六十二年之月數并閏

章中六千七百四十四

五百六十二年除閏月數

周天六百一十五萬八千一十七

度法通度內斗分之數

通數六百一十五萬八千一十七

日法通二十九日內經月餘之數

沒分六百一十五萬八千一十七

餘數通經沒六十九內分五萬七千一百

八十四得此數

餘數八萬八千四百一十七

度法通一年下五內斗分之數

沒法八萬八千四百一十七

一年之同成甲之外分數

斗分四千一百一十七

從斗量周天至此不成度之分

虛分九萬七千八百八十三

經月二十九日外少此不滿三十日

小分法二十四

二十四氣除周天分之數也

歲中十二

十二月之中氣

會數一百七十三

月一出一入黃道之日數周髀六二十三分月之二十也

會餘六萬七千一百一十七

百七十二日外不成日之分

會通三千六百一十四萬二千八百七
以日法通百七十二內會餘之數

會虛十四萬一千四百一十三
會餘之外不成度之數

周日二十七
周天用日月行數

周餘十一萬五千六百三十一
周天用日外及本處

周通五百七十四萬五千九百四十一
日法通內十七內分

周虛九萬二千八百九十九
用餘外不成日之數

小周七千五百一十三
月一日行之數

月周二十二萬五千三百九十

通小周內度數

朔望合數十四

半經月日數

度餘十五萬九千五百八十八半

半經月日餘

入交限數一百五十八度

月出入黃道減半月之數

度餘十一萬六千五十八半

減半月小餘之外

推月朔弦望術第一

推積月 術曰置入紀以來盡所求年減一以章月乘

之章歲如一所得為積月不盡為閏餘閏餘三百五十

五以上其年有閏餘五百一十五以上進退在天正十一月前後以冬至定之

推積日 術曰以通數乘積月為朔積分日法如一為

積日不盡為小餘以六旬去積日不盡為大餘命大餘

以紀今命以甲戌紀算外即所求年天正十一月朔日

求次月朔 術曰加大餘二十九小餘十一萬六千四百

十七滿除如上命以紀算外即次月朔日其小餘滿虛

分九萬七千八百八十三者其月大減者其月小

求上下弦望 術曰加朔大餘七小餘七萬九千七百九十四小分一小分滿四從小餘小餘滿日法從大餘大餘滿六十去之命以紀算即上弦日又加得望下弦後月朔

推二十四氣閏術第二

推二十四氣 術曰置入紀以來盡所求年減一以餘數乘之部法如一為積沒不盡為小餘以六旬去積沒不盡為大餘命以紀算外即所求年天正十一月冬至

曰

求次氣術 術曰加大餘十五小餘三千六百八十四
小分一小分滿小分法二十四從小餘小餘滿部法從
大餘一命如止算外即次氣曰

推閏 術曰以閏餘減章歲餘以歲中十二乘之滿章
閏二百七得一月餘半法以上亦得一月數起天正十
一月算外即閏月閏月有進即以無中氣定之

推閏又法 術曰以歲中乘閏餘加章閏得一盈章中

六千七百四十四數起冬至算外中氣終閏月也盈中
氣在朔若二日即前月閏

冬至十一月中 小寒十二月節 大寒十二月中

立春正月節 雨水正月節 驚蟄二月節

春分二月中 清明三月節 穀雨三月中

立夏四月節 小滿四月中 芒種五月節

夏至五月中 小暑六月節 大暑六月中

立秋七月節 處暑七月中 白露八月節

秋分八月中

寒露九月節

霜降九月中

立冬十月節

小雪十月中

大雪十一月節

推合朔却去度表裏術第三

推合朔却去交度

術曰置入紀以來朔積分又以所

入紀交會差分并之

甲戌紀交會差分二千六百五十二萬二千六百四十九以會

通去之所得為積交不盡者以日法約之為度不盡者

為度餘即所求年天正十一月朔却去交度及餘度

甲子紀

紀首合朔日月合璧交中

甲戌紀

紀首合朔月
在日道表

交會差一百二十七度

度餘三萬九千三百四十九

甲申紀

紀首合朔月
在日道裏

交會差八十一度

度餘一萬一千五百六十一

甲午紀

紀首合朔月
在日道裏

度餘十九萬二千三百一十三

甲辰紀

紀首合朔月
在日道表

交會差一百六十二度

度餘二萬三千一百二十二

甲寅紀

紀首合朔月在日道表

交會差一百一十五度

度餘二十萬三千八百七十四

求次月却去交度

術曰加度二十九度餘十萬六百

四十七度餘滿日法從度度滿會數去之亦降其會餘即次月朔却去交度及度餘

求望却去交度

術曰加度十四度餘十五萬九千五

百八十八半滿除如上即望却去交度及度餘

推月在日道表裏

術曰置入紀以來朔積分又以紀

交會差分并之倍會通去之餘以會通減之得一減者為月在日道裏無所得者為月在日道表

求次月表裏 術曰加次月度及度餘加表滿會數及會數餘則在裏加裏滿會數及會餘則在表

推交道所在日 術曰以十一月朔却去交度及餘減會數及會餘會餘若不足減者減一度加日法乃減之又以十一月朔小餘加之滿日法從度餘為度餘即是天正十一月朔前去交度及餘如歷月大小除之起天

正月十一月不滿月者為八月算外交道所在日又以歲中乘八月小餘日法除之所得命以子算即交道所在辰其交在望前者其月朔則交道望則月蝕交在望後者其月月蝕後朔交會交正在望者其月月蝕既前後朔交會交正朔者日蝕既前後月望皆月蝕求後交月及日術曰以會數及會餘加前八月算及餘餘滿日法從日日如厯月大小除之起前交月算外即後交月及日以次放之

推交會起角 術曰其月在外道先會後交者虧從東南角起先交後會者虧從西南角起其月在內道先會後交者虧從西北角起合交中者蝕之既其月蝕在日之衝起角亦如之

推蝕分多少 術曰其朔望去交度及度餘如入交限數一百五十八度度餘十一萬六千五十八半以上者以減會數及會數餘餘為不蝕度若朔望去交度如朔望合數十四度度餘十五萬九千五百八十八半以下

者即是不餘度皆以減十五餘為餘蝕分朔望去交度
盡者蝕之既

推合朔月蝕入遲疾厯盈縮術第四

推合朔入遲疾厯 術曰置入紀以來朔積分又以所

入紀遲疾差分并之

甲戌紀遲差分二日三十
五萬三千一百九十一

以通周

去之所得日餘周不盡者以日法約之為日不盡者為

日餘命日算外即所求年天正月十一月合朔入厯日

求次月入厯日 術曰加一日日餘二十萬三千五百

四十六日蝕滿日從日法日滿周日及周餘去之命如
上算外即次月入厯日

求望入厯 術曰加日十四日餘十五萬九千五百八
十八半滿除如上算外即望入厯

日月行遲疾度

及合

損益率

盈縮并率

盈縮積分

一日十四度

四百二分

益七百五十七

盈初

二日十四度

三百三十四分

益六百八十九

盈七百五十

盈積分二萬一千一十一

三日十四度

二百四十一分

益六百一十七

盈一千四百三十六

盈積分四萬一百三十五

四日十四度

一百九十分

益五百四十五

盈二千六十二

盈積分五萬七千二百三

十二

五日十四度

一百一十一分

益四百六十六

盈二千六百七

盈積分七萬二千三百六

十

六日十三度

五百二十分

益二百一十五

盈三千七十三

盈積分八萬五千二百九

十四

七日十三度

二百九十六分

益八十九

盈三千三百八十八

盈積分九萬四千三十七

八日十三度

六十八分

損一百三十九

盈三千四百七十七

盈積分九萬六千五百七

九日十二度

四百八十六分

損二百八十三

盈三千三百三十八

盈積分九萬二千六百四

十九

十日十二度

三百七十九分

損三百九十

盈三千五十五

盈積分八萬四千七百九

十四

十一日十二度

三百六十七分

損五百二

盈二千六百六十五

盈積分七萬三千九百六

十九

十二日十二度

一百五十一分

損六百一十八

盈二千一百六十三

盈積分六萬三十六

十三日十二度

四十分

損七百二十九

盈一千五百四十五

盈積分四萬二千八百八

十三

十四日十一度

五百一十五分

損八百一十六

盈八百一十六

盈積分二萬二千六百四

十九

十五日十二度

三十分八

益七百三十一

縮初

十六日十二度

一百二十三分十

益六百三十六

縮七百三十一

縮積分二萬二百九十

十七日十二度

三百一十一分

益五百五十八

縮一千三百七十七

縮積分三萬八千二百二

十

十八日十二度

二百二十四分

益四百四十五

縮一千九百三十五

縮積分五萬三千七百

十九日十二度

四百三十五分

益三百三十四

縮二千三百八十

縮積分六萬六千五十九

二十日十二度

五百五十五分

益二百一十四

縮二千七百一十四

縮積分七萬五千三百二

十九

二十一日十三度

一百三十八分

益七十九

縮二千九百二十八

縮積分八萬一千二百六

十九

二十二日十二度

二百七十分

損六十三

縮三千七

縮積分八萬三千四百六

十二

二十三日十三度

四百三十二分

損二百二十五

縮二千九百四十四

縮積分八萬一千七百一

十三

二十四日十四度

三十分

損三百八十八

縮二千七百一十九

縮積分七萬五千四百六

十八

二十五日十四度

一百九十四分

損五百四十九

縮二千三百三十一

縮積分六萬四千六百九

十九

二十六日十四度

三百一十九分

損六百七十四

縮一千七百八十二

縮積分四萬九千四百六

十一

二十七日十四度

三百三十六分

損七百一

縮一千一百八

縮積分三萬七百五十四

周日十四度

三百七十九分

損七百三十四

縮四百七

縮積分一萬一千二百九

十七

推合朔交會月蝕定大小蝕

術曰以入厯日餘乘所

入厯下損益率以小周七千五百一十三除之所得損益盈縮積分為定積分積分盛者以減本朔望小餘縮者加之加之滿日法者交會加時在後日減之不足減者減一日加日法乃減之交會加時在前日月蝕者隨定大小蝕餘為定日加時

推加時 術曰以歲中乘定小餘日法除之所得命以子算外朔望加時有餘不盡者四之如法得一為少二為半三為太半又有餘者三之如法得一為彊半法以

上排成一不滿半法棄之以彊并少為少彊并半為半彊并太為太彊得二彊者為少弱以之并少為半弱以之并半為太弱以之并太為一辰弱隨所在辰而命之即其彊弱日之衝為破月常在破下蝕

推日月合朔弦望度第五

推日度 術曰置入紀以來朔積日以日度法一萬六千八百六十乘之滿周天去之餘以日度法約之為度餘命起牛前十二度宿次除之不滿宿者算外即所求

年天正十一月朔夜半日所在度及分

推日度又法 術曰置周天三百六十五度斗分四千一百一十七以冬至去朔日數減一以減周天度冬至小餘減斗分斗分不足減者減一度加日度法乃減之命起如上算外即所求年天正十一月朔夜半日所在度及分

求日次月次日所在度 術曰月大者加度三十月小者加度二十九次日者加度一宿次除之遙斗除其分

推合朔日月共度 術曰以章歲五百六十二乘朔小
餘以章月六千九百五十一除之所得為大分不盡為
小分以加夜半日度分滿日度法從度命如上算外
即所求年天正十一月合朔日月共度

推合朔日月共度又法 術曰加度二十九大分八千
九百四十五小分六千九百一十九小分滿章月從大
分大分滿日度法從度宿次除之逕斗去其分算外即
次月合朔日月共度

推月度 術曰置入紀以來朔積日以周二十二萬五千三百九十乘之滿周天去之餘以日度法約之為度餘為度分命起牛前十二度宿次除之不滿宿者算外即所求年天正十一月朔夜半月所在度及分

推月度又法 術曰以小周乘朔小餘為實章歲乘日法為法實如法得一為度不滿法者以章月除之為大分餘為小分所得以減合朔度及度分算外即所求年天正十一月朔夜半月所在度及分

求月次月度 術曰月小加度二十二分七千三百七十三月大加度三十五分一萬三千五百八十三分滿日度法從度宿次除之不滿宿者算外即月次月所在度

求月次日度 術曰加度十三分六千二百一十分滿日度法從度除如上算外即月次日所在度

求弦望日所在度 術曰加合朔度七十分六千四百五十一小分三千四百六十一微分二微分滿四從小

分小分滿章月從大分大分滿日度法從度命如上算
外即上弦日所在度又如得望下弦後月合朔

求弦望月所在度 術曰加合朔度九十八大分一萬
一千六百九十五小分五千二百二十五微分一滿除
如上算外即上弦日月所在度又如得望下弦後月合
朔

斗二十六度 牛八度 女十二度 虛十度

危十七度 室十六度 壁九度

北方玄武七宿九十八度

分四千一百一十七

奎十六度

婁十二度

胃十四度

昂十一度

畢十六度

觜二度

參九度

西方白虎七宿八十度

井三十三度

鬼四度

柳十五度

星七度

張十八度

翼十八度

軫十七度

南方朱鳥七宿一百一十二度

角十二度

亢九度

氏十五度

房五度

心五度

尾十八度

箕十一度

東方蒼龍七宿七十五度

周天三百六十五度一萬六千八百六十分度之四千一百一十七通之得六百一十五萬八千一十七名曰周天

推土王滅沒卦候上朔日術第六

推土王日 術曰置四立大小餘各減其大餘十八小餘四千四百二十小分十八微分二大餘不足減者加

六十乃減之小餘不足減者減一日加部法乃減之小分不足減者減小餘一加小分法二十四乃減之微分不足減者減小分一加五然後皆減之命以紀算外即四立前土王日

推土王又法 術曰加冬至大餘二十七小餘六千六百三十一小分六微分三微分滿五從小分小分滿小分法從小餘小餘滿部法從大餘一命以紀算外即季冬土王日

求次季土王日

術曰加大餘九十一小餘五千二百

四十四小分六小分滿小分法從小餘小餘滿部法從大餘大餘滿六十去之命以紀算外即次季土王日

推減沒

術曰因冬至積沒有小餘者加積沒一以沒

分乘之以沒法八萬八千四百一十七除之所得為積日不盡為沒餘六旬去積日不盡為沒日命以紀算外即所求天正十一月冬至後沒日

求次減 術曰加沒日六十九沒餘五萬七千二百四

十四沒餘滿沒法從沒日沒日滿六十去之命以紀算
外即次沒日餘盡者為滅

求次沒 術曰加沒日六十九沒餘一萬九百一十五
沒分六萬二千二百八十五沒分滿沒法從沒餘沒餘
滿部法從沒日命起前沒月厯月大小除之不滿月者
即後沒日及沒餘沒分命曰如上算外即次沒日

推四正卦 術曰因冬至大小餘即坎卦用事日春分
即震卦用事日夏至即離卦用事日秋分即兌卦用事

日中孚因坎卦

求次卦 術曰加坎卦大餘六小餘一千四百七十三
小分十四微分四微分滿五從小分小分滿小分法從
小餘小餘滿部法從大餘大餘滿六十去之命以紀算
外即復卦用事日

十一月未濟蹇頤中孚復

十二月屯謙睽升臨

正月小過蒙益漸泰

二月需隨晉解大壯

三月豫訟蠱革夬

四月旅師比小畜乾

五月大有家人井咸姤

六月鼎豐渙履遯

七月恒節同人損否

八月巽萃大畜賁觀

九月歸妹无妄明夷困剥

十月艮既濟噬嗑大過坤

四正為方伯中孚為三公復為天子屯為諸侯謙為大夫睽為九卿升還從三公周而復始

九三應上九清淨微溫陽風九三應上六降赤決溫陰雨六三應上六日澤寒陰雨六三應上九麴塵決寒陽風諸卦上有陽爻者陽風上有陰爻者陰雨

推七十二候 術曰因冬至大小餘即虎始交日加大餘五小餘一千二百二十八微分一微分滿三從小分

小分滿小分法從小餘小餘滿部法從大餘大餘滿六

十去之命以紀算外 依次候日

冬至

虎始交

芒始生

荔挺生

小寒

蚯蚓結

麋角解

水泉動

大寒

鴈北向

鵲始巢

雉始雊

立春

鷄始乳

東風解凍

蟄蟲始振

雨水

魚上負冰

獺祭魚

鴻鴈來

驚蟄

始雨水

桃始華

倉庚鳴

春分

鷹化為鳩

玄鳥至

雷始發聲

清明

電始見

蟄蟲咸動

蟄蟲啓戶

穀雨

桐始華

田鼠化為鴽

虹始見

立夏

萍始生

戴勝降桑

蜩蟬鳴

小滿

蚯蚓出

王瓜生

苦菜秀

芒種

靡草死

小暑至

蟠蜋生

夏至

鴈始鳴

反舌無聲

鹿角解

小暑

蟬始鳴

半夏生

木槿榮

大暑

溫風至

蟋蟀居壁

鷹乃學習

立秋

腐草為螢

土潤溽暑

涼風至

處暑

白露降

寒蟬鳴

鷹祭鳥

白露

天地始肅

暴風至

鴻雁來

秋分

玄鳥歸

羣鳥養羞

雷始收聲

寒露

蟄蟲附戶

殺氣浸盛

陽氣日衰

霜降

水始涸

鴻雁來賓

雀入大水化為蛤

立冬

菊有黃華

豺祭獸

水始冰

小雪

地始凍

雉入大水為蜃 虹藏不見

大雪

冰始壯

地始坼

鶡旦鳴

推上朔 術曰置入紀以來盡所求年減一以六律乘之以六旬去之不盡者命以甲子算上即上朔日推五星見伏術第七

上元甲子以來至春秋魯隱公元年歲在己未積二十九萬二千七百三十六算

上元甲子以來至今大魏興和二年歲在庚申積二十

九萬三千九百九十七算

木精曰歲星其數六百七十二萬二千八百八十八
火精曰熒惑其數一千三百一十四萬九千八十三
土精曰鎮星其數六百三十七萬四千六十一

金精曰太白其數九百八十四萬三千八百八十二
水精曰辰星其數一百九十五萬三千七百一十七

推五星 術曰置上元以來盡所求年減一以周天乘
之為五星之實各以其數為法除之所得為積合不盡

為合餘以合餘減法餘為入歲度分以日度法約之所
得即所求年天正十一月冬至後晨夕合度算及度餘
其金水以一合日數及合餘減合度算及度餘得一者
為晨無所得者為夕若度餘不足減者減合度算一加
日度法乃減之命起牛前十二度宿次除之不滿宿者
算外即所求年天正十一月冬至後晨夕合度及度餘
徑推五星 術曰置上元以來盡所求年減一如法算
之合度餘滿日度法加合度算一合度算滿合終日數

去之亦以合終日餘減合度若不足減者減合度算一
加周虛積年盡所得即所求年天正十一月冬至後晨
夕合度竿及度餘其求水及命度皆如上法

求星合月及日 術曰置冬至去朔日數減一加合度
算冬至小餘以加合度餘合度餘滿日度法去之加合
度算一合度竿變成合日算合度餘為日餘命日起天
正十一月如厯月大小除之不滿月者算外即星合月
及日有閏以閏計之

求後合月及日 術曰以合終日數及合終日餘加前
入月算及餘餘滿日度法後日一日如歷月大小除之
起前合月算外即後合月及日其金水以合日數及一
合日餘加之加夕得晨加晨得夕也

求後合度 術曰以行星度餘加前合度及度餘度餘
滿日度法從度命起前合度宿次除之不滿宿者算外
即後合度餘逕斗除其分其分四千一百一十七

歲星合終日數三百九十八合終日餘一萬二千六百

八周虛三千二百五十二行星三十三度度餘九千四百九十一

歲星晨與日合在日後伏十六日日餘六千八百四行星二度度餘一萬三千一百七十五晨見東方順疾日行五十八分之十一五十八日行十一度順遲日行九分五十八日行九度而留不行二十五日而旋逆日行七分之一八十四日退十二度復留二十五日復順遲日行九分五十八日行九度復順疾日行十一分五十

八日行十一度在日前夕伏西方順十六日日餘六千
八百四行星二度度餘一萬三千一百七十六而與日
合

熒惑合終日數七百七十九合終日餘一萬五千一百
四十三周虛一千七百一十七行星四十九度度餘六
千九百九

熒惑晨與日合在日後伏七十一日日餘一萬六千一
行星五十五度度一萬三千九百四十三晨見東方

順疾日行二十三分之十四一百八十四日行一百一十二度順遲日行十二分九十一日行四十八度而留不行十一日而旋逆日行六十二分之十七六十二日退十七度復留十一日復順遲日行十二分九十二日行四十八度復順疾日行十四分一百八十四日行一百一十二度在日前夕伏西方順七十一日日餘一萬六千二行星五十度度餘一萬三千九百四十三而與日合

鎮星合終日數三百七十八合終日餘九百八十一周
虛一萬五千八百七十九行星十二度度餘一萬三千
七百二十四

鎮星晨與日合在日後伏十八日日餘四百九十行星
二度度餘六千八百六十二晨見東方順日行十二分
之一八十四日行七度而留不行三十六日而旋逆日
行十七分之一一百二日退六度復留三十六日復順
日行十二分之一八十四日行七度在日前夕伏西方

順十八日日餘四百九十一行星二度度餘六千八百六十二而與日合

太白合終日數五百八十三合終日餘一萬四千五百

二周虛二千三百五十八行星二百九十一度

亦曰一合日數

度一餘萬五千六百八十一

亦曰一合日數

太白夕與日合在日前伏四十一日日餘一萬五千六百八十一行星五十一度度餘一萬五千六百八十一夕見西方順疾日行一度十三分之三九十一日行二

百一十二度順遲日行一度十三分之二九十一日行
五度順大疾日行十五分之十一四十五日行三十三
度而留不行八日而旋逆日行三分之二九日退六度
在日前夕伏西方伏六日退四度而與日晨合

太白晨與日合在日後伏六日退四度晨見東方逆日
行三分之二九日退六度而留不行八日順日行十五
分之十一四十五日行三十三度順疾日行一度十三
分之二九十一日行一百五度順大疾日行一度十三

分之二九十一日行一百一十二度在日後晨伏東方
順四十一日日餘一萬五千六百八十一行星五十一
度度餘一萬五千六百八十一而與日夕合

辰星合終日數一百一十五合終日餘一萬四千八百
一十八周虛二千四十四行星五十七度

亦曰一合日數

度餘

一萬五千八百四十八

亦曰一合日數

辰星夕與日合在日前伏十七日日餘一萬五千八百
四十八夕見西方順疾日行一度三分之一十八日行

二十四度順遲日行七分之五七日行五度而留不行
四日在日前夕伏西方逆十一日退六度而與日晨合
辰星晨與日合在日後伏十一日退六度晨見東方而
留不行四日順遲日行七分之五七日行五度順疾日
行一度三分之一十八日行二十四度在日後晨伏東
方順十七日日餘一萬五千八百三十八行星三十四
度度餘一萬五千八百四十八而與日夕合

五星歷步 術曰以術法伏日度及餘加星合日度及

餘餘滿日度法一萬六千八百六十得一從令命之加
前得星見日度及餘以星行分母乘見度分日度法如
一得一分不盡半法以上亦得一以加所行分分滿其
母得一度逆順母不同以當行之母乘故分故母如一
為當行分留者承前逆則減之伏不盡度除斗分以行
母為率分有損益前後相御十四

求五星行所在度 術曰以行分子乘行日數分母除
之所得即星行所在度

魏書卷一百七下

魏書卷一百七下考證

律歷志叙亦知猶不及五度○五監本訛作王今改正
甲子之歲入甲戌紀紀法十六萬八千六百注千部成
紀○臣人龍按詩大雅疏二十部為一紀則千字誤
也

度餘十一萬六千五十八半○半監本訛作度今改正
推合朔却去度表裏術第三甲寅紀注月在日道表○

監本月在日道下脫表字今增正

推日月合朔弦望度第五又如得望下弦後月合朔○
如字當作加

推五星見伏術第七歲在己未○己監本作乙今據歷
代甲子圖改正

魏書卷一百七下考證

欽定四庫全書

魏書卷一百八之一

齊

魏

收

撰

志第十

禮四之一

夫在天莫明於日月在人莫明於禮儀先王以安上治
民用成風化苟或失之斯亡云及聖者因人有尊敬哀
思嗜慾喜怒之情而制以上下隆殺長幼衆寡之節本

於人心會於神道故使三才惟穆百姓允諧而淳澆世殊質文異設損益相仍隨時作範秦滅儒經漢承其弊三代之禮蓋如綫焉劉氏中興頗率周典魏晉之世抑有可知自永嘉擾攘神州蕪穢禮壞樂崩人神殲殄太祖南定燕趙日不暇給仍世征伐務恢疆宇雖馬上治之未遑制作至於經國軌儀互舉其大但事多粗略且兼闕遺高祖稽古率由舊則斟酌前王擇其令典朝章國範煥乎復振早年應世叡慮未從不爾劉馬之迹夫

何足數世宗優遊在上致意玄門儒業文風顧有未洽
墜禮淪聲因之而往肅宗已降魏道衰羸太和之風仍
世凋落以至於海內傾圯綱紀泯然嗚呼魯秉周禮國
以克固齊臣撤器降人折謀治身不得以造次忘治國
庸可而須臾忽也初自皇始迄於武定朝廷典禮之迹
故總而錄之

太祖登國元年即代王位於牛川西向設祭告天成禮
天興元年定都平城即皇帝位立壇兆告祭天地祝曰

皇帝臣珪取用玄牡昭告于皇天后土之靈上天降命
乃眷我祖宗世王幽都珪以不德纂戎前緒思寧黎元
冀行天罰殪劉顯屠衛辰平慕容定中夏羣下勸進謂
宜正位居尊以副天人之望珪以天時人謀不可久替
謹命禮官擇吉日受皇帝璽綬惟神祇其丕祚於魏室
永綏四方事畢詔有司定行次正服色羣臣奏以國家
繼黃帝之後宜為土德故神獸如牛牛土畜又黃星顯
曜其符也於是始從土德數用五服尚黃犧牲用白祀

天之禮用周典以夏四月親祀于西郊徽幟有加焉
二年正月帝親祀上帝于南郊以始祖神元皇帝配為
壇通四陛為壇埽三重天位在其上南面神元西面五
精帝在壇內壝內四帝各於其方一帝在未日月五星
二十八宿天一太一北斗司中司命司祿司民在中壝
內各因其方其餘從食者合一千餘神餼在外壝內藉
用藻秸玉用四珪幣用束帛牡用黝犢器用陶匏上帝
神元用犢各一五方帝共用犢一日月等共用牛一祭

畢燎牲體左於壇南巳地從陽之義其瘞地壇兆制同
南郊明年正月辛酉郊天癸亥瘞地於北郊以神元寶
皇后配五岳名山在中壝內四清大川於外壝內后土
神元后牲共用玄牲一玉用兩珪幣用束帛五岳等用
牛一祭畢瘞牲體右於壇之北亥地從陰也乙丑赦京
師畿內五歲刑以下其後冬至祭上帝于圜丘夏至祭
地于方澤用牲帛之屬與二郊同

冬十月平文昭成獻明廟成歲五祭用二至二分臘牲

用太牢常遣宗正兼太尉率祀官侍祀置太社太稷帝社於宗廟之右為方壇四陛祀以二月八月用戊皆太牢句龍配社周棄配稷皆有司侍祀立祖神常以正月上未設藉於端門內祭牲用羊豕犬各一又立神元思帝平文昭成獻明五帝廟於宮中歲四祭用正冬臘九月牲用馬牛各一太祖親祀宮中立星神一歲一祭常以十二月用馬薦各一牛豕各二雞一太祖初有兩彗星見劉后使占者占之曰祈之則當掃定天下后從之

故立其祀又立

闕二字

神十二歲一祭常以十一月各用

牛一雞三又立主神四歲二祭常以八月十月各用羊

一又置獻明以上所立天神四十所歲二祭亦以八月

十月神尊者以馬次以牛小以羊皆女巫行事又於雲

中及盛樂神元舊都祀神元以下七帝歲三祭正冬臘

用馬牛各一祀官侍祀明年春帝始躬耕籍田祭先農

用羊一祀日於東郊用騂牛一秋分祭月於西郊用白

羊一

天賜二年夏四月復祀天于西郊為方壇一置木主七於上東為二陛無等周垣四門門各依其方色為名牲用白犢黃駒白羊各一祭之日帝御大駕百官及賓國諸部大人畢從至郊所帝立青門內近南壇西內朝臣皆位於帝北外朝臣及大人咸位於青門之外后率六宮從黑門入列於青門內近北並西面廩犧令掌牲陳於壇前女巫執鼓立於陛之東西面選帝之十族子弟七人執酒在巫南西面北上女巫升壇搖鼓帝拜若肅

拜百官内外盡拜祀訖復拜拜訖乃殺牲執酒七人西向以酒灑天神主復拜如此者七禮畢而返自是之後歲一祭

太宗永興三年三月帝禱于武周車輪二山初清河王紹有寵於太祖性凶悍帝每以義責之弗從帝懼其變乃於山上祈福於天地神祇及即位壇兆後因以為常祀歲一祭牲用牛帝皆親之無常日

明年立太祖廟于白登山歲一祭具太牢帝親之亦無

常月兼祀皇天上帝以山神配旱則禱之多有效是歲
詔郡國於太祖巡幸行宮之所各立壇祭以太牢歲一
祭皆牧守侍祀又立太祖別廟於宮中歲四祭用牛馬
羊各一又加置天日月之神及諸小神二十八所於宮
內歲二祭各用羊一後二年於白登西太祖舊遊之處
立昭成獻明太祖廟常以九月十月之交帝親祭牲用
馬牛羊及親行軀劉之禮別置天神等二十三於廟左
右其神大者以馬小者以羊華陰公主帝姊也元紹之

為逆有保護功故別立其廟於太祖廟垣後因祭薦馬
又於雲中盛樂金陵三所各立太廟四時祀官侍祀

泰常三年為五精帝兆於四郊遠近依五行數各為方
壇四陛埽壝三重通四門以太皞等及諸佐隨配侑祭
黃帝常以立秋前十八日餘四帝各以四立之日牲各
用牛一有司主之又六宗靈星風伯雨師司民司祿先
農之壇皆有別兆祭有常日牲用少牢立春之日遣有
司迎春於東郊祭用酒脯棗栗無牲幣又立五岳四瀆

廟於桑乾水之陰春秋遣有司祭有牲及幣四瀆唯以牲牢準古望秩云其餘山川及海若諸神在州郡者合三百二十四所每歲十月遣祀官詣州鎮遍祀有水旱災厲則牧守各隨其界內祈謁其祭皆用牲王畿內諸山川皆列祀次祭各有水旱則禱之

明年八月帝嘗於白登廟將薦熟有神異焉太廟博士許鍾上言曰臣聞聖人能饗帝孝子能饗親伏惟陛下孝誠之至通於神明近嘗於太祖廟有車騎聲從北門

入殷殷輶輶震動門闕執事者無不肅慄斯乃國祚永隆之兆宜告天下使知聖德之深遠

辛未幸代至鴈門闕望祀恒岳後二年九月幸橋山遣有司祀黃帝唐堯廟明年正月南巡恒岳祀以太牢辛洛陽遣使以太牢祀嵩高華岳還登太行五月至自洛陽諸所過山川羣祀之後三年二月祀孔子於國學以顏淵配

神廡二年帝將征蠕蠕省郊祀儀四月以小駕祭天神

畢帝遂親戎大捷而還歸格於祖禰徧告羣神

九月立密皇太后廟於鄴后之舊鄉也置祀官太常博士齋郎三十餘人侍祀歲五祭

太延元年立廟於恒岳華嵩岳上各置侍祀九十人歲時祈禱水旱其春秋泮涸遣官率刺史祭以牲牢有玉幣

魏先之居幽都也鑿石為祖宗之廟於烏洛侯國西北自後南遷其地隔遠真君中烏洛侯國遣使朝獻云石

廟如故民常祈請有神驗焉其歲遣中書侍郎李敞詣石室告祭天地以皇祖先妣配祝曰天子肅謹遣敞等用駿足一元大武敢昭告于皇天之靈自啓闢之初祐我皇祖于彼土田歷載億年聿來南遷惟祖惟父光宅中原克剪凶醜拓定四邊冲人纂業德聲弗彰豈謂幽遐稽首來王具知舊廟弗毀弗亡悠悠之懷希仰餘光王業之興起自皇祖綿綿瓜瓞時惟多祜敢以丕功配饗于天子子孫孫福祿永延敞等既祭斬樺木立之以

置牲體而還後所立樺木生長成林其民益神奉之咸謂魏國感靈祇之應也石室南距代京可四千餘里明年六月司徒崔浩奏議神祀多不經案祀典所宜祀凡五十七所餘復重及小神請皆罷之奏可

十一年十一月世祖南征逕恒山祀以太牢浮河濟祀以少牢過岱宗祀以太牢至魯以太牢祭孔子遂臨江登瓜步而還

文成皇帝即位三年正月遣有司詣華岳修廟立碑數

十人在山上聞虛中若音聲聲中稱萬歲云

和平元年正月帝東巡歷橋山祀黃帝幸遼西望祀醫
無閭山遂緣海西南幸冀州北至中山過恒岳禮其神
而返明年帝南巡過石門遣使者用玉璧牲牢禮恒岳
四月旱下詔州郡於其界內神無大小悉洒掃薦以酒
脯年登之後各隨本秩祭以牲牢至是羣祀先廢者皆
復之

顯祖皇興二年以青徐既平遣中書令兼太常高允奉

玉幣祀於東岳以太牢祀孔子

高祖延興二年有司奏天地五郊社稷已下及諸神合
一千七十五所歲用牲七萬五千五百顯祖深愍生命
乃詔曰朕承天事神以育羣品而咸秩處廣用牲甚衆
夫神聰明正直享德與信何必在牲易曰東隣殺牛不
如西隣之禘祭實受其福苟誠感有著雖行潦菜羹可
以致大嘏何必多殺然後獲祉福哉其命有司非郊天
地宗廟社稷之祀皆無用牲於是羣祀悉用酒脯

先是長安牧守常有事於周文武廟四年坎地埋牲廟
玉發見四月詔東陽王丕祭文武二廟以廟玉露見若
即而埋之或恐愚民將為盜竊勅近司收之府藏

六月顯祖以西郊舊事歲增木主七易世則更兆其事
無益於神明初草前儀定置主七立碑於郊所

太和二年旱帝親祈皇天日月五星於苑中祭之夕大
雨遂赦京師

三年上祈於北苑又禱星於苑中

六年十一月將親祀七廟詔有司依禮具儀於是羣臣
議曰昔有虞親虔祖考來格殷宗躬謁介福迺降大魏
七廟之祭依先朝舊事多不親謁今陛下孝誠發中思
親祀事稽合古王禮之常典臣等謹案舊章并採漢魏
故事撰祭服冠屨牲牢之具罍洗簋盞俎豆之器百官
助祭位次樂官節奏之引升降進退之法別集為親拜
之儀制可於是上乃親祭其後四時常祀皆親之

十年四月帝初以法服御輦祀於西郊

十二年十月帝親築圜丘於南郊

十三年正月帝以大駕有事於圜丘五月庚戌車駕有事於方澤壬戌高祖臨皇信堂引見羣臣詔曰禮記祭法稱有虞氏禘黃帝大傳曰禘其祖之所自出又稱不王不禘論曰禘自既灌詩頌長發大禘爾雅曰禘大祭也夏殷四時祭禘禘烝嘗周改禘為祠祭義稱春祭秋嘗亦夏殷祭也王制稱禘禘祫禘祫嘗祫烝其禮傳之文如此鄭玄解禘天子祭圜丘曰禘祭宗廟大祭亦曰

禘三年一祫五年一禘祫則合羣毀廟之主於太廟合而祭之禘則增及百官配食者審諦而祭之天子先禘祫而後時祭諸侯先時祭而後禘祫魯禮三年喪畢而祫明年而禘園丘宗廟大祭俱稱禘祭有兩禘明也王肅解禘祫稱天子諸侯皆禘於宗廟非祭天之祭郊祀后稷不稱禘宗廟稱禘禘祫一名也合而祭之故稱祫審諦之故稱禘非兩祭之名三年一祫五年一禘總而互舉之故稱五年再殷祭不言一禘一祫斷可知矣禮

文大略諸儒之說盡具於此卿等便可議其是非尚書游明根左丞郭祚中書侍郎封琳著作郎崔光等對曰鄭氏之義禘者大祭之名大祭圜丘謂之禘者審諦五精星辰也大祭宗廟謂之禘者審諦其昭穆圜丘常合不言祫宗廟時合故言祫斯則宗廟祫禘竝行圜丘一禘而已宜於宗廟俱行禘祫之禮二禮異故名殊依禮春廢犢鉶於嘗於蒸則祫不於三時皆行禘祫之禮中書監高閭儀曹令李韶中書侍郎高遵等十三人對稱

禘祭圜丘之禘與鄭義同其宗廟禘祫之祭與王義同與鄭義同者以為有虞禘黃帝黃帝非虞在廟之帝不在廟非圜丘而何又大傳稱祖其所自出之祖又非在廟之文論稱禘自既灌事似據爾雅稱禘大祭也頌長發大禘也殷王之祭斯皆非諸侯之禮諸侯無禘禮唯夏殷夏祭稱禘又非宗廟之禘魯行天子之儀不敢專行圜丘之禘改殷之禘取其禘名於宗廟因先有祫遂生兩名據王氏之義祫而禘祭之故言禘祫總謂再殷

祭明不異也禘祫一名也其禘祫止於一時止於一時者祭不欲數數則黷一歲而三禘愚以為過數帝曰尚書中書等據二家之義論禘祫詳矣然於行事取衷猶有未允監等以禘祫為名義同王氏禘祭圜丘事與鄭同無所間然尚書等與鄭氏同兩名兩祭竝存竝用理有未稱俱據二義一時禘祫而闕二時之禘事有難從夫先王制禮內緣人子之情外協尊卑之序故天子七廟諸侯五廟大夫三廟數盡則毀藏主於太祖之廟三

年而禘祭之世盡則毀以示有終之義三年而禘以申追遠之情禘禘既是一祭分而兩之事無所據毀廟三年一禘又有不盡四時於禮為闕七廟四時常祭禘則三年一祭而又不究四時於情為簡王以禘禘為一祭王義為長鄭以圜丘為禘與宗廟大祭同名義亦為當今互取鄭王二義禘禘并為一名從王禘是祭圜丘大祭之名上下同用從鄭若以數則黷五年一禘改禘從禘五年一禘則四時盡禘以稱今情禘則依禮文先禘

而後時祭便即施行著之於令永為世法

高問曰書稱肆類於上帝禋于六宗六宗之祀禮無明文名位壇兆歷代所疑漢魏及晉諸儒異說或稱天地四時或稱六者之間或稱易之六子或稱風雷之類或稱星辰之屬或曰世代所宗或云宗廟所尚或曰社稷五祀凡有十一家自晉已來逮于聖世以為論者雖多皆有所闕莫能評究遂相因承別立六宗之兆總為一位而祭之比勅臣等評議取衷附之祀典臣等承旨披

究往說各有其理較而論之長短互有若偏用一家事
或差舛衆疑則從多今惑則仍古請依先別處六宗之
兆總為一祀而祭之帝曰詳定朝令祀為事首以疑從
疑何所取正昔石渠虎閣之議皆準類以引義原事以
證情故能通百家之要定累世之疑況今有文可據有
本可推而不評而定之其致安在朕躬覽尚書之文稱
肆類上帝禋於六宗文相連屬理似一事上帝稱肆而
無禋六宗言禋而不別其名以此推之上帝六宗當是

一時之祀非別祭之名肆類非獨祭之目焚煙非他祀之用六宗者必是天皇大帝及五帝之神明矣禋是祭帝之事故稱禋以闕其他故稱六以證之然則肆類上帝禋于六宗一祭也互舉以成之今祭圜丘五帝在焉其牲幣俱禋故稱肆類上帝禋于六宗一祭而六祀備焉六祭既備無煩復別立六宗之位便可依此附令永為定法

十四年八月詔曰丘澤初志配尚宜定五德相襲分叙

有常然異同之論著於往漢未詳之說疑在今史羣官
百辟可議其所應必令合衷以成萬代之式中書監高
閭議以為帝王之作百代可知運代相承書傳可驗雖
祚命有長短德政有優劣至於受終嚴祖殷薦上帝其
致一也故敢述其前載舉其大略臣聞居尊據極允應
明命者莫不以中原為正統神州為帝宅苟位當名全
化迹流洽則不專以世數為與奪善惡為是非故堯舜
禪揖一身異尚魏晉相代少紀運殊桀紂至虐不廢承

歷之叙屬惠至昏不闕周晉之錄計五德之論始自漢
劉一時之議三家致別故張蒼以漢為水德賈誼公孫
臣以漢為土德劉向以漢為火德以為水德者正以嘗
有水溢之應則不推運代相承之數矣以土德者則以
亡秦繼歷相即為次不推逆順之異也以為火德者懸
證赤帝斬蛇之符棄秦之暴越惡承善不以世次為正
也故以承周為火德自茲厥後乃以為常魏承漢火生
土故魏為土德晉承魏土生金故晉為金德趙承晉金

生水故趙為水德燕承趙水生木故燕為木德秦承燕
木生火故秦為火德秦之末滅皇魏未克神州秦氏既
亡大魏稱制玄朔故平文之廟始稱太祖以明受命之
證如周在岐之陽若繼晉晉亡已久若棄秦則中原有
寄推此而言承秦之理事為明驗故以魏承秦魏為土
德又五緯表驗黃星曜彩考氏定實合德軒轅承土祖
末事為著矣又秦趙及燕雖非明聖各正號赤縣統有
中土郊天祭地肆類咸秩明刑制禮不失舊章奄岱踰

河境被淮漢非若齷齪邊方僭擬之屬遠如孫權劉備
近若劉裕道成事繫蠻夷非關中夏伏唯聖朝德配天
地道被四海承乾統歷功侔百王光格同於唐虞享祚
流於周漢正位中境奄有萬方今若并棄三家遠承晉
氏則蔑中原正次之實存之無損於此而有成於彼廢
之無益於今而有傷於事臣愚以為宜從尚黃定為土
德入前代之君明賢之史皆因其可褒褒之可貶貶之
今議者偏據可絕之義而不錄可全之禮所論事大垂

之萬葉宜竝集中秘羣儒人人別議擇其所長於理為
悉秘書丞臣李彪著作郎崔光等議以為尚書閣議繼
近秦氏臣職掌國籍頗覽前書惜此正次慨彼非緒輒
仰推帝始遠尋百王魏雖建國君民兆朕振古祖黃制
朔繇迹有因然此帝業神元為首案神元晉武往來和
好至于桓穆洛京破亡二帝志摧聰勒思存晉氏每助
劉琨申威并冀是以晉室銜扶救之仁越石深代王之
請平文太祖抗衡苻石終平燕氏大造中區則是司馬

祚終於邲鄢而元氏受命於雲代蓋自周之滅及漢正
號幾六十年著符尚赤後雖張賈殊議覈疑而卒從火
德以繼周氏排虐羸以比共工蔑暴項而同吳廣近蠲
謬偽遠即神正若此之明也寧使白蛇徒斬雕雲空結
哉自有晉傾淪暨登國肇號亦幾六十餘載物色旗幟
率多從黑是又自然合應玄同漢始且秦并天下草創
法度漢仍其制少所變易猶仰推五運竟踵隆姬而况
劉石苻燕世業促編綱紀弗立魏接其弊自有彝典豈

可異漢之承木捨晉而為土邪夫皇統崇極承運至重
必當推協天緒考審正次不可雜以僭竊參之彊狡神
元既晉武同世桓穆與懷愍接時晉室之淪平文始大
廟號太祖抑亦有由紹晉定德孰曰不可而欲次茲偽
僭豈非惑乎臣所以悽悽惜之唯垂察納詔命羣官議
之

十五年正月侍中司空長樂王穆亮侍中尚書左僕射
平原王陸叡侍中吏部尚書中山王王元孫侍中尚書

駙馬都尉南平王馮誕散騎常侍都曹尚書新秦侯游
明根散騎常侍南部令鄧侍祖祕書中散李愷尚書左
丞郭祚右丞霸城子衛慶中書侍郎封琳中書郎秦昌
子崔挺中書侍郎賈元壽等言臣等受勅共議中書監
高閭祕書丞李彪等二人所議皇魏行次尚書高閭以
石承晉為水德以燕承石為木德以秦承燕為火德大
魏次秦為土德皆以地據中夏以為得統之徵皇魏建
號事接秦末晉既滅亡天命在我故因中原有寄即而

承之彪等據神元皇帝與晉武並時桓穆二帝仍修舊
好始自平文逮于太祖抗衡秦趙終平慕容晉祚終於
秦方大魏興於雲朔據漢棄秦承周之義以皇魏承晉
為水德二家之論大略如此臣等謹共參論伏惟皇魏
世王玄朔下迄魏晉趙秦二燕雖地據中華德祚微淺
竝獲推叙於理未愜又國家積德修長道光萬載彪等
職主東觀詳究圖史所據之理其致難奪今欲從彪等
所議宜承晉為水德詔曰越近承遠情所未安然考次

推時頗亦難繼朝賢所議豈朕能有違奪便可依為水
德祖申臘辰

四年經始明堂改營太廟詔曰祖有功宗有德自非功
德厚者不得擅祖宗之名居二祧之廟仰惟先朝舊事
舛駁不同難以取準今將述遵先志具詳禮典宜制祖
宗之號定將來之法烈祖有創基之功世祖有開拓之
德宜為祖宗百世不遷而遠祖平文功未多於昭成然
廟號為太祖道武建業之勳高於平文廟號為烈祖比

功校德以為未允朕今奉尊道武為太祖與顯祖為二
祧餘者以次而遷平文既遷廟唯有六始今七廟一則
無主唯當朕躬此事亦臣子所難言夫生必有終人之
常理朕以不德忝承洪緒若宗廟之靈獲全首領以沒
于地為昭穆之次心願畢矣必不可豫設可垂之文示
後必令遷之司空公長樂王穆亮等奏言升平之會事
在於今推功考德實如明旨但七廟之祀備行日久無
宜闕一虛有所待臣等愚謂依先尊祀可垂文示後理

哀如此不敢不言詔曰理或如此比有間隙當為文相示

八月壬辰詔郡國有時果可薦者竝送京師以供廟饗又詔曰禮云自外至者無主不立先朝以來以正月吉日於朝廷設幕中置松柏樹設五帝坐此既無可祖配揆之古典實無所取可去此祀又探策之祭既非禮典可悉罷之

戊午詔曰國家自先朝以來饗祀諸神凡有一千二百

餘處今欲減省羣祀務從簡約昔漢高之初所祀衆神
及寢廟不少今日至于元成之際匡衡執論乃得減省
後至光武之世禮儀始備饗祀有序凡祭不欲數數則
黷黷則不敬神聰明正直不待煩祀也又詔曰明堂太
廟竝祀祖宗配祭配享於斯備矣白登崢山鷄鳴山廟
唯遣有司行事馮宣王誕生先后復因在官長安立廟
宜異常等可勅雍州以時供祭又詔曰先恒有水火之
神四十餘名及城北星神今圜丘之下既祭風伯雨師

司中司命明堂祭門戶井竈中霤每神皆有此四十神計不須立悲可罷之

甲寅集羣官詔曰近論朝日夕月皆欲以二分之一於東西郊行禮然月有餘閏行無常準若一依分日或值月出於東而行禮於西尋情即理不可施行昔祕書監薛謂等嘗論此事以為朝日以朔夕月以朏卿等意謂朔朏二分何者為是尚書游明根對曰考案舊式推校衆議宜從朏月

十一月己未朔帝釋禪祭於太和廟帝袞冕與祭者朝服既而帝冠黑介幘素紗深衣拜山陵而還宮庚申帝親省齋宮冠服及郊祀俎豆癸亥冬至將祭圜丘帝袞冕劔舄侍臣朝服辭太和廟之圜丘升祭柴燎遂祀明堂大合既而還之太和廟乃入甲子帝袞冕辭太和廟臨太華殿朝羣官既而帝冠通天絳紗袞臨饗禮帝感慕樂懸而不作丁卯遷廟陳列冕服帝躬省之既而帝袞冕辭太和廟之太廟百官陪從奉神主於齋車至新

廟有司升神主於太廟諸王侯牧守四海蕃附各以其職來祭

十六年正月戊午詔曰夫四時享祀人子常道然祭薦之禮貴賤不同故有邑之君祭以首時無田之士薦以仲月況七廟之重而用中節者哉自頃蒸嘗之禮頗違舊義今將仰遵遠式以此孟月植祔於太廟但朝典初改衆務殷湊無遑齋潔遂及於今又接神饗祖必須擇日今禮律未宣有司或不知此可勅太常令剋日以聞

二月丁酉詔曰夫崇聖祀德遠代之通典秩

闕三字中

古之近規故三五至仁唯德配享夏殷私已稍用其姓
且法施於民祀有明典立功垂惠祭有恒式斯乃異代
同途奕世共軌今遠遵明令憲章舊則比於祀令已為
決之其孟春應祀者頃以事殷遂及今日可令仍以仲
月而饗祀焉凡在祀令者其數有五帝堯樹則天之功
興巍巍之治可祀於平陽虞舜播太平之風致無為之
化可祀於廣寧夏禹禦洪水之災建天下之利可祀於

安邑周文公制禮作樂垂範萬葉可祀於洛陽其宣尼之廟已於中省當別勅有司饗薦之禮自文公已上可令當界牧守各隨所近攝行祀事皆用清酌尹祭也

丙午詔有司剋吉亥備小駕躬臨千畝官別有勅

癸丑帝臨宣文堂引議曹尚書劉昶鴻臚卿游明根行儀曹事李韶授策孔子崇文聖之謚於是昶等就廟行事既而帝齋中書省親拜祭於廟

九月甲寅朔大享於明堂祀文明太后於玄室帝親為

之詞

十月己亥詔曰夫先王制禮所以經綸萬代貽法後昆
至乃郊天享祖莫不配祭然而有節白登廟者有為而
興昭穆不次故太祖有三層之宇巴陵無方丈之室又
常用季秋躬駕展虔祀禮或有褻慢之失嘉樂頗涉野
合之譏今授衣之旦享祭明堂玄冬之始奉烝太廟若
復致齋白登便為一月再駕事成褻瀆回詳二理謂宜
省一白登之高未若九室之美幃次之華未如清廟之

盛將欲廢彼東山之祀成此二享之敬可具勅有司但令內典神者攝行祭事獻明道武各有廟稱可具依舊式自太宗諸帝昔無殿宇因停之

十八年南巡正月次殷比干墓祭以太牢

三月詔罷西郊祭天

十九年帝南征正月車駕濟淮命太常致祭又詔祀岱岳

三月癸亥詔曰知太和廟已就神儀靈主宜時奉寧可

剋三月三日巳巳內奉遷於正廟其出金墉之儀一準
出代都太和之式入新廟之典可依近至金墉之軌其
威儀鹵簿如出代廟百官奉遷宜可省之但令朝官四
品已上侍官五品已上及宗室奉迎六月相州刺史高
閭表言伏惟太武皇帝發孝思之深誠同渭陽之遠感
以鄴土舅氏之故鄉有歸魂之舊宅故為密皇后立廟
於城內歲時祭祀置廟戶十家齋宮三十人春秋烝嘗
冠服從事刺史具威儀親行薦酌升降揖讓與七廟同

儀禮畢撤會而罷今廟殿虧漏門牆傾毀簠簋故敗行禮有闕臣備職司目所親覩若以七廟惟新明堂初制配饗之儀備於京邑者便應罷壞輟其常祭如以功高特立宜應新其靈宇敢陳所見伏請恩裁詔罷之

十一月庚午帝幸委粟山議定圜丘已卯帝在合溫室引咸陽王禧司空公穆亮吏部尚書任城王澄及議禮之官詔曰朝集公卿欲論圜丘之禮今短晷斯極長日方至案周官祀昊天上帝於圜丘禮之大者兩漢禮有

參差魏晉猶亦未一我魏氏雖上參三皇下考叔世近
代都祭園丘之禮復未考周官為不刊之法今以此祭
園丘之禮示卿等欲與諸賢考之厥衷帝曰夕牲之禮
無可依準近在代都已立其議殺牲裸神誠是一日之
事終無夕而殺牲待明而祭員外散騎常侍劉芳對曰
臣謹案周官牧人職正有夕展牲之禮實無殺牲之事
祕書令李彪曰夕不殺牲誠如聖旨未審告廟以不臣
聞魯人將有事于上帝必先有事于泮宮注曰先人以

此推之應有告廟帝曰卿言有理但朕先以郊配意欲廢告而卿引證有據當從卿議

帝又曰圜丘之牲色無常準覽推古事乖互不一周家用騂解言是尚晉代靡知所據舜之命禹悉用鳧辭復言玄牡告于后帝今我國家時用夏正至於牲色未知何準祕書令李彪曰觀古用玄似取天玄之義臣謂宜用玄至於五帝各象其方色亦有其義帝曰天何時不玄地何時不黃意欲從玄

又曰我國家常聲鼓以集衆易稱二至之日商旅不行
后不省方以助微陽微陰今若依舊鳴鼓得無闕寢鼓
之義員外郎崔逸曰臣案周禮當祭之日鼙鼓鼙鼓八
面而作猶不妨陽臣竊謂以鼓集衆無妨古義

癸未詔三公衮冕八章太常驚冕六章用以陪薦

甲申長至祀昊天於雩粟山大夫祭

疑

二十年立方澤於河陰仍遣使者以太牢祭漢光武及

明章三帝陵

魏書卷一百八之一

魏書卷一百八之一考證

高祖太和十五年十一月奉神主於齋車○神監本誤
作臣今改正

魏書卷一百八之一考證